

漢文佛典雜阿含經補充資料（二）

陰相應補充資料

色是我等四句

(二十句薩迦耶見)

1 色是我	受是我	想是我	行是我	識是我
2 色異我	受異我	想異我	行異我	識異我
3 我在色 (中)	我在受 (中)	我在想 (中)	我在行 (中)	我在識 (中)
4 色在我 (中)	受在我 (中)	想在我 (中)	行在我 (中)	識在我 (中)

彼一切非我，不異我，不相在 (四句否定)：

色非我	受非我	想非我	行非我	識非我
色不異我	受不異我	想不異我	行不異我	識不異我
色不在我	受不在我	想不在我	行不在我	我不在識
我不在色	我不在受	我不在想	我不在行	識不在我

《雜阿含經論會編（上）》：

「眼」：(瑜伽師地論卷 86)

復次、由二種相，當知聖者慧眼清淨，謂由遠塵及離垢故。由見所斷諸煩惱纏得離繫故，名為遠塵；由彼隨眠得離繫故，說名離垢。又現觀時，有羸我慢隨入作意間無間轉，若遍了知所取能取所緣平等，彼即斷滅，彼斷滅故，說名遠塵；一切見道所斷煩惱隨眠斷故，說名離垢。

「勝利」：(瑜伽師地論卷 86)

復次、遠塵、離垢，於諸法中得法眼時，當知即得十種勝利。何等為十？

一者、於四聖諦已善見故，說名見法。

二者、隨獲一種沙門果故，說名得法。

三者、於己所證，能自了知，我今已盡所有那落迦、傍生、餓鬼，我證預流，乃至廣說，由如是故說名知法。

四者、得四證淨，於佛、法、僧如實知故，名遍堅法。

五者、於自所證無惑。

六者、於他所證無疑。

七者、宣說聖諦相應教時，不藉他緣。

八者、不觀他面，不看他口，於此正法、毘奈耶中，一切他論所不能轉。

九者、記別一切所證解脫，都無所畏。

十者、由二因緣，隨入聖教，謂正世俗及第一義故。

(Y 30p40~41)

《瑜伽師地論》卷 84 (釋雜阿含經 265，陰相應經 48)

復次色如聚沫者。速增減故。水界生故。思飲食味水所生故。不可揉撻故。非如泥團可令轉變造作餘物。是故說言不可揉撻。又實非聚似聚顯現。能發起一有情解故。

受喻浮泡者。三和合生不久堅住相似法故。言如地者。所謂諸根彼生依故。言如雲者。謂諸境界。言如雨者。所謂諸識。如雨擊者。所謂諸觸。如浮泡者。所謂諸受速疾起謝，不堅住故。

想同陽焰者。颺動性故。無量種相變易生故。令於所緣發顛倒故。令其境界極顯了故。由此分別男女等相成差別故。

云何行類芭蕉。如明眼人者。謂聖弟子。言利刃者。謂妙慧刀。言入林者。謂於五趣舉意攀緣種種自性眾苦差別同樹法故。為取端直芭蕉柱者。謂為作者、受者我見。截其根者。謂斷我見。折葉者。委細簡擇唯有種種思等諸行差別法故。彼於其中都無所獲者。謂彼經時無堅住故。何況堅實者。何況有餘常、恒、實我、作者、受者而可得見。

云何識如幻事。言幻士者。隨福、非福、不動行。識住四衢道者。住四識住。造作四種幻化事者。謂象馬等。如象身等雖現可見。而無真實象身等事。如是應知隨福非福不動行。識住四識住。雖有作者及受者等我相可見。然無真實我性可得。又識於內隱其實性。外現異相猶如幻像。

(CBETA, T30, no. 1579, p. 768, c11-p. 769, a8)

《大般若波羅蜜多經 201-400 卷》卷 350〈60 相引攝品〉：

具壽善現復白佛言：「世尊！云何菩薩摩訶薩安住靜慮波羅蜜多，引攝安忍波羅蜜多？」

佛言：「善現！若菩薩摩訶薩安住靜慮波羅蜜多修學安忍，觀色如聚沫，觀受如浮泡，觀想如陽焰，觀行如芭蕉，觀識如幻事，作是觀時，於五取蘊不堅固想常現在前。復作是念：『諸法皆空無我、我所，色是誰色？受是誰受？想是誰想？行是誰行？識是誰識？』如是觀時，復作是念：『諸法皆空離我、我所，誰能割截？誰受割截？誰能毀罵？誰受毀罵？誰復於中發起瞋恨？』菩薩如是依止靜慮，審諦觀察能具安忍，復持如是安忍善根，與諸有情平等共有迴向無上正等菩提。以無所得而為方便。如是迴向大菩提時遠離三心，謂誰迴向？用何迴向？迴向何處？如是三心皆永不起。善現！是為菩薩摩訶薩安住靜慮波羅蜜多，引攝安忍波羅蜜多。

(CBETA, T06, no. 220, p. 797, a7-22)

20 種薩迦耶見（陰相應第 177 經）

色是我，色異我，我在色，色在我；

受是我，受異我，我在受，受在我；

想是我，想異我，我在想，想在我；

行是我，行異我，我在行，行在我；

識是我，識異我，我在識，識在我。

一、色是我

1. 云何見色是我？ 得地一切入處正受觀已，作是念：地即是我，我即是地，我及地唯一無二，不異不別。如是水即是我，我即是水；火即是我，我即是火；風即是我，我即是風；青即是我，我即是青；黃即是我，我即是黃；赤即是我，我即是赤；白即是我，我即是白，一切入處正受觀已，作

是念：白即是我，我即是白，唯一無二，不異不別。如是於一切入處，一一計我，是名色即是我。

2. 云何見色異我？ 若彼見受是我，見受是我已，見色是我所；或見想是我，色是我所；行是我，色是我所；識即是我，色是我所，是名色異我。
3. 云何見我中色？ 謂見受是我，色在我中；又見想是我，色在我中；行是我，色在我中；識即是我，色在我中，是名我中色。
4. 云何見色中我？ 謂見受即是我，於色中住，入於色，周徧其四體；見想是我，於色中住，周徧其四體；行是我，於色中住，周徧其四體；識是我，於色中住，周徧其四體，是名色中我。

二、受是我

1. 云何見受即是我？ 謂六受身：眼觸生受、耳觸生受、鼻觸生受、舌觸生受、身觸生受、意觸生受。此六受身，一一見是我，是名受即是我。
2. 云何見受異我？ 謂見色是我，受是我所；謂想是我，受是我所；行是我，受是我所；識是我，受是我所，是名受異我。
3. 云何見我中受？ 謂色是我，受在其中；想是我，受在其中；行是我，受在其中；識是我，受在其中，是謂我中受。
4. 云何見受中我？ 謂色是我，於受中住，周徧其四體；想是我，於受中住，周徧其四體；行是我，於受中住，周徧其四體；識是我，於受中住，周徧其四體，是名受中我。

三、想是我

1. 云何見想即是我？ 謂六想身：眼觸生想、耳觸生想、鼻觸生想、舌觸生想、身觸生想、意觸生想。此六想身，一一見是我，是名想即是我。
2. 云何見想異我？ 謂見色是我，想是我所；受是我，想是我所；行是我，想是我所；識是我，想是我所，是名想異我。
3. 云何見我中想？ 謂色是我，想在中住；受是我，想在中住；行是我，想在中住；識是我，想在中住，是謂我中想。
4. 云何見想中我？ 謂色是我，於想中住，周徧其四體；受是我，於想中住，周徧其四體；行是我，於想中住，周徧其四體；識是我，於想中住，周徧其四體，是名想中我。

四、行是我

1. 云何見行是我？ 謂六思身：眼觸生思、耳觸生思、鼻觸生思、舌觸生思、身觸生思、意觸生思。於此六思身，一一見是我，是名行即是我。
2. 云何見行異我？ 謂色是我，行是我所；受是我，行是我所；想是我，行是我所；識是我，行是我所，是名行異我。
3. 云何見我中行？ 謂色是我，行在中住；受是我，行在中住；想是我，行在中住；識是我，行在中住，是謂我中行。
4. 云何見行中我？ 謂色是我，於行中住，周徧其四體；謂受是我，於行中住，周徧其四體；想是我，於行中住，周徧其四體；識是我，於行中住，周徧其四體，是名行中我。

五、識是我

1. **云何見識即是我？** 謂六識身：眼識、耳識、鼻識、舌識、身識、意識身。於此六識身，一一見是我，是名識即是我。
2. **云何見識異我？** 見色是我，識是我所；見受是我，識是我所；想是我，識是我所；行是我，識是我所，是名識異我。
3. **云何見我中識？** 謂色是我，識在中住；受是我，識在中住；想是我，識在中住；行是我，識在中住，是名我中識。
4. **云何識中我？** 謂色是我，於識中住，周徧其四體；受是我，於識中住，周徧其四體；想是我，於識中住，周徧其四體；行是我，於識中住，周徧其四體，是名識中我。

雜阿含經五七〇：(會編下冊質多羅相應)

如是我聞：一時，佛住菴羅聚落菴羅林中，與眾多上座比丘俱。時質多羅長者，詣諸上座所，稽首禮足，退坐一面。白諸上座言：「諸世間所見，或說有我，或說眾生，或說壽命，或說世間吉凶，云何尊者！此諸異見，何本？何集？何生？何轉？」時諸上座默然不答。如是三問，亦三默然。

時有一下座比丘，名梨犀達多，白諸上座言：「我欲答彼長者所問」。諸上座言：「善！能答者答」。時長者即問梨犀達多：「尊者！凡世間所見，何本？何集？何生？何轉？」尊者梨犀達多答言：「長者！凡世間所見，或言有我，或說眾生，或說壽命，或說世間吉凶，斯等諸見，一切皆以身見為本，身見集，身見生，身見轉」。復問：「尊者！云何為身見」？答言：「長者！愚癡無聞凡夫，見色是我，色異我，色中我，我中色。受……。想……。行……。識見是我，識異我，我中識，識中我。長者！是名身見」。復問：「尊者！云何得無此身見」？答言：

「長者！謂多聞聖弟子，不見色是我，不見色異我，不見我中色，色中我。不見受……。想……。行……。識是我，不見識異我，不見我中識，識中我，是名得無身見」。

復問：「尊者！其父何名，於何所生」？答言：「長者！我生於後方長者家」。質多羅長者語尊者梨犀達多：「我及尊者二父，本是善知識」。梨犀達多答言：「如是，長者」！質多羅長者語梨犀達多言：「尊者！若能住此菴羅林中，我盡形壽供養——衣服、飲食、隨病湯藥」。尊者梨犀達多默然受請。時尊者梨犀達多，受質多羅長者請，供養障礙故，久不詣世尊所。時諸上座比丘，為質多羅長者種種說法，示教照喜；示教照喜已，質多羅長者歡喜隨喜，作禮而去。

(《雜阿含經論會編(下)》>>p.466 ~ p.467『質多羅相應』)

《阿毘達磨俱舍論》卷 19〈5 分別隨眠品〉：

論曰。執我及我所是薩迦耶見。壞故名薩。聚謂迦耶。即是無常和合蘊義。迦耶即薩名薩迦耶。此薩迦耶即五取蘊。為遮常一想故立此名。要此想為先方執我故。……如契經說。苾芻當知。世間沙門、婆羅門等。諸有執我等隨觀見一切。唯於五取蘊起。……

(CBETA, T29, no. 1558, p. 100, a1-27)